



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

***Komunikadu Imprensa***  
***Tribunál Distritál Dili***  
**13 Abril 2015**

## **Tribunál adia julgamentu la tuir mekanizmu prosesu penál**

Iha 09 Abril 2015, Tribunál Distritál Dili prezide julgamentu hodi anunsia adiamentu ba kazu furtu agravadu ida ne'ebé akontese iha Distritu Dili.

Tuir orariu, julgamentu sei hahú iha tuku 14:30 lorokraik, maibe tanba iha asuntu urjente. Juis titulár ba kazu ne'e komunika ba parte ministériu públiku no defeza katak julgamentu muda ba tuku 16:00 lorokraik. Iha oras ne'ebé determinadu atu hahú julgamentu, defensor titular ne'ebé representa arguidu la marka prezensa tanba sei partisipa hela iha plenaria Komisaun Nasionál ba Eleisaun (CNE) nian.

Tuir esplikasaun juis katak tribunál koko atu nomeia ofisiál justisa ne'ebé lisensiadu direitu hanesan pesoa idonia atu kontinua julgamentu, maibé ofisial sira rejeita no dehan katak *“ne'e servisu defensor públiku nian, se ami ofisiál justisa halo sira-nia servisu se mak halo fali ami-nia servisu.”*

“JSMP fiar katak autór judisiáriu sira okupadu tanba servisu barak ne'ebé presiza atende, maibé tenke asegura katak servisu atendentu ba neseside justisa ba interesadu sira mak prioridade liu servisu adisonál sira seluk ne'ebé lei fo kompetensia atu hala'o,” dehan Luis de Oliveira Sampaio, Diretor Ezekutivu JSMP.

Iha audiénsia partisipa mós husi Dr. Estaquio Guterres nu'udar defensor públiku estajiáriu. Tribunál representa husi Dra. Jacinta Correia da Costa husu ba defensor ne'e atu substitui defensor titular halo defeza ba arguidu. Maske nune'e tuir deklarasaun husi defensor substutu ba tribunál katak defensor titular la permite defensor substitui tanba kazu ne'e grave nomós iha regra interna la autóriza.

Tanba razaun sira ne'e juis titular deside marka fali agenda julgamentu ba iha 20 Abril 2015 tuku 09:30 dadeer.

Rua setubal, Colmera, Dili Timor Leste  
PoBox: 275  
Telefone: 3323883 |77295795  
[www.jsmp.tl](http://www.jsmp.tl)  
[info@jsmp.minihub.org](mailto:info@jsmp.minihub.org)  
Facebook: [www.facebook.com/timorleste.jsmp](https://www.facebook.com/timorleste.jsmp)  
Twitter: @JSMPtl

Tuir artigu 66 Kódigu Prosesu Penál alinea 2 katak autóridade judisiáriu ne'ebé prezide faze prosesuál ida-idak mak iha kompeténsia atu nomeia defensor ba arguidu.

Tribunál haktuir katak kazu ne'e halo adiamentu dala rua ona. Adiamentu primeiru tanba auzente husi ministériu públiku no adiamentu segundu tanba defensor titular partisipa reuniaun no la permite defensor seluk substitui. JSMP konsidera adiamentu iha kazu ne'e, nu'udar inkumprimentu ba Kódigu Prosesu Penál artigu 260 ne'ebé defini katak;

1. Ministériu Públiku ka defensor nia falta la serve hanesan baze atu adia audiénsia julgamentu;
2. Iha Ministériu Públiku nia fatin hatama Ministériu Públiku nia substitutu legál; iha defensor nia fatin tenke hatama pesoa idónea, ho preferensia ba advogadu lisenziadu iha direitu. Selae, iha nulidade insanavel tuir artigu 103 Kódigu Prosesu Penál husi alinea 1 pontu (b) ne'ebé dehan katak kuandu ministériu públiku la promove prosesu ka ministériu públiku la tama iha aktu ne'ebé lei obriga nia prezensa nomós iha pontu (c) kuandu la nomeia defensor ka kuandu defensor la tama iha situaun ne'ebé tenke iha defensor nia assistensia.
3. Tenke fo ba substitutu ne'e tempu nesesariu atu prepara julgamentu, nomea-damente atu konsulta autus no kontakta arguidu.

JSMP hanoin katak mekanizmu husi Kódigu Prosesu Penál ne'e bele asegura justisa ba parte hotu ne'ebé buka justisa ba sira-nia kazu.

JSMP preokupa, loloos ne'e tribunál tenke fo prioridade ba kazu ne'ebé iha kolaborasaun di'ak husi arguidu, testamuña no vítima sira.

Kazu ne'e regista iha tribunál ho Nú Prosesu: 646/ 12.TDDIL. Audiénsia adiamentu ne'e prezide husi Dra. Jacinta Correia da Costa, Dra. Zumiaty Freitas no Dra. Maria Modesta. Ministériu Públiku Dr. Vicenti Brito akompaña husi Dr. Osorio de Deus (prokurador estajiáriu). Defensor titular ba arguidu Dra. Marçia Sarmiento no atu substitui husi Dr. Estaquio Guterres (defensor públiku estajiáriu).

Atu hetan informasaun kompleitu bele kontaktu ba:

Luis de Oliveira Sampaio  
Diretór Ezekutivu JSMP  
Diresaun e-mail: [luis@jsmp.minihub.org](mailto:luis@jsmp.minihub.org)